

四庫全書

經部

欽定四庫全書

經部

四書大全論語集註卷七

詳校官給事中 臣戴 璐

刑部郎中 臣許兆椿覆勘

覆校官中書 臣田尹衡

校對官檢討 臣郭 寅

謄錄監生 臣朱 恂

欽定四庫全書

論語集註大全卷七

述而第七

此篇多記聖人謙已誨人之辭及其容貌行事之實凡三十七章

子曰述而不作信而好古竊比於我老彭

好去聲

述傳舊而已作則創始也故作非聖人不能而述則

賢者可及

記曰作者之謂聖述者之謂明

竊比尊之之辭我親之之

辭老彭商賢大夫見

賢遍反

大戴禮

虞德篇有商老彭之語包氏註云商

賢大夫

盖信古而傳述者也孔子刪詩書定禮樂贊周

易修春秋皆傳先王之舊而未嘗有所作也故其自

言如此盖不惟不敢當作者之聖而亦不敢顯然自

附於古之賢人盖其德愈盛而心愈下不自知其辭

之謙也

朱子曰孔子賢於堯舜非老彭之所及自不須說但其謙退不居而反自比焉且其辭氣

謙遜而又出於誠實所以為盛德之至也

然當是時

新安陳氏曰此以下推廣餘意

作者

略備夫子盖集羣聖之大成而折衷之其事雖述而

功則倍於作矣此又不可不知也

問述而不作如何  
程子曰此聖人不

得位止能述而已○問聖人不得時不得位只如此  
聖人得時得位時更有制作否朱子曰看聖人告顏  
子四代禮樂只是恁地恐不大段更有制作亦因四  
代有此禮樂而因革之亦未是作處○問春秋恐是  
作否曰其事則齊桓晉文其文則史其義則丘竊取  
之矣看來是寫出魯史中間微有更改爾○問信而  
好古曰既信古又好古今人多信而不好或好而不  
信如好之者他也且恁地說信之者雖知有箇理恁  
地畢竟是有了箇篤好底意思○楊氏曰孔子自謂  
述而不作孟子言孔子作春秋春秋雖孔子作然其  
事則桓文其文則史孔子自謂其義則某竊取之是  
亦述而已○慶源輔氏曰作者略備觀諸經可見集  
大成而折衷之亦於諸經見之然羣聖所作因時制  
宜以成一代之制夫子折衷參互訂正以垂萬世之

法夫子賢於堯舜者在是○雙峯饒氏曰春秋雖因魯史而修之然實却是作蓋賞罰天子之事時王不能正其賞罰故春秋為之褒善貶惡以誅亂賊於既死之後是以匹夫而代天子行賞罰也此事前古所無孔子始創為之故雖述而實作集大成者詳見孟子集註書述政事詩道性情禮以正行樂以養德各是一事如樂之小成夫子合六經而折衷之如樂之集衆小成而為大成○新安陳氏曰諸家說此章多於述作二事着意信而好古一句則忽略之夫信而好古乃述而不作之本夫子嘗自謂好古敏以求之又謂不如某之好學常人之所以不知好古不能好學皆信道不篤故爾惟能篤於信道所以深好古道惟篤信好古所以惟迷古而不敢自我作古焉此朱子今人多信而不好或好而不信一條所以不可無也

○子曰默而識之學而不厭誨人不倦何有於我哉

識音

志又

如字

識記也默識謂不言而存諸心也

朱子曰非是聽人說後記得是得於

心自不能忘拳拳服膺而勿失也○雙峯饒氏曰默識與道聽塗說者相反道聽塗說更不復留為身心受用默識則其所得者深而所存者固矣詩云中心藏之何日忘之易曰默而成之不言而信存乎德行皆是此意○勿軒熊氏曰先言默一說識知也不言識者聖門之學以沉潛淵默為本

而心解也前說近是

新安陳氏曰不言而存諸心者其功實不言而心解者其意玄

何有於我言何者能有於我也三者已非聖人之極

至而猶不敢當則謙而又謙之辭也

朱子曰默而識之至誨人不倦

是三者雖非聖人之極至在學者亦難如平時講貫方能記得或因人提撕方能存得若默而識之乃不言而存諸心非心與理契安能如此學不厭在學者久亦易厭視人與己若無干涉誨之安能不倦此三者亦須是心無間斷方皆如此又曰今學者須是將此三句時時省察我還能默識否我學還不厭否我教還不倦否如此乃好○默而識之便是得之於心學不厭便是更加講貫誨不倦便是施於人也○問何有於我哉曰此語難說聖人是自謙言我不曾有此數者聖人常有慊然不足之意衆人雖見他是仁之至熟義之至精他只管自見得有欠闕處○此必因人稱聖人有此聖人以謙辭承之記者失却上一節只做聖人自話記了○南軒張氏曰默識非言意所可及蓋森然於不睹不聞之中者也在已則學不



厥施諸人則教不倦成已成物之不息也此亦是作  
知識說○雲峯胡氏曰學貴自得故在默識自得而  
不自以為得故學而不厭自得  
而必欲人之同得故教而不倦

○子曰德之不修學之不講聞義不能徙不善不能改  
是吾憂也

尹氏曰德必修而後成

勉齋黃氏曰修治也謂去其疵類而全其善也

學必

講而後明

上蔡謝氏曰學須是熟講學不講用盡工夫只是舊時人

見善能徙改

過不吝此四者日新之要也苟未能之聖人猶憂況

學者乎

朱子曰修德是本如有害人之心便是仁不修有穿窬之心便是義不修德是理之得於

吾心者已是我有底物事了更日日磨礪勿令間斷  
徒義改不善須與分別義是事之宜我做這事覺未  
甚合宜須徒令合宜此却未有不善處不善便是過  
惡須速全體改之始得有輕重之別○須實見得是  
如何德是甚麼物事如何喚做修如何喚做不修人  
而無欲害人之心這是德得之於吾心也然害人之  
心或有時而萌者是不能修者也德者道理得於吾  
心之謂修者好好修治之謂更須自體之須把這許  
多說話做自家身上說不是為別人說○問德之不  
修可以包下三句否曰若恁地夫子但說一句便了  
何用更說四句徒義改過略似修德裏面事然也別  
是箇頭項講學自是講學修德自是修德如致知格  
物是講學誠意正心修身是修德博學審問慎思明  
辨是講學篤行是修德又曰不善自家做得淫邪非  
僻底事徒義是雖無過惡然做得未恰好便是不合  
義若聞人說如何方是恰好便當徒而從之聖人說

這幾句淺深輕重盡在裏面聞義不能徙底罪小不善不能改底罪大但聖人不分細大都說在裏面學者皆當著工夫○問先知德不可不修方知學不可不講能講學方能徙義能徙義方能改不善如此看如何曰修德是本脩德恰似說入則孝出則弟謹而信汎愛衆而親仁學不可不講恰似說行有餘力則以學文遷善改過是修德中緊要事蓋只脩德而不遷善改過亦不能得長進○德之不脩至是我憂也這雖是聖人以此教人然學不厭之意多見於此使有一毫自以為聖任其自爾則雖聖而失其聖矣此是聖人自憂也聖人固無是四者之憂所以然者亦自貶以教人之意○南軒張氏曰夫德不脩則無以有諸躬學不講則無以明夫善聞義不能徙則何有於義不善不能改則安於不善而已是豈不可憂乎○勉齋黃氏曰德以修而日新學以講而日明徙義則善日益改不善則過日損四者修身之大要也不

此之務可無憂乎○雲峯胡氏曰德必修而後新學以講而益新徒與改皆是自新故尹氏以為日新之要○新安陳氏曰修德而繼以講學如尊德性而道問學是也脩德為大本講學為實功徒義改不善修德之條目而講學之效驗也修德而能講學則行己應事始能知其孰為義孰為非義孰為善孰為不善必徙之改之始可以為修德始無負於講學矣不然德之不修自若也學亦徒虛言之講耳聖人不自聖猶以是為憂此聖所以益聖常人不知憂聖人之憂此愚所以益愚也

○子之燕居申申如也天天如也

燕居閒

音閑

暇無事之時楊氏曰申申其容舒也天天

其色愉也

胡氏曰申有展布之意天和悅之意惟身可言舒布故知以容言惟顏貌可言和

悅故知以色言○洪氏曰易於形容所不能言者必曰如至鄉黨一言之不足則復言之與此義同○

程子曰此弟子善形容聖人處也為

去聲

申申字說不

盡故更著

陟畧反作  
着非下同

天字今人燕居之時不怠惰

放肆必太嚴厲嚴厲時著此四字不得怠惰放肆時

亦著此四字不得惟聖人便自有中和之氣

上蔡謝氏曰善

觀聖人者可以得之於儀刑蓋周旋中禮者必其盛德之至是以二三子無時不觀省於斯焉燕居非鞠躬如不容之時是以其容申申非踧踏屏氣之時是以其色天天此之謂中節○朱子曰申申是言其不局促是心廣體胖後恁地所謂色愉只是和悅底意思但此只是燕居如此在朝及接人又不然○問申

申天大聖人得於天之自然若學者有心要收束則入於嚴厲有心要舒泰則入於放肆惟理義以養其氣養之久則自然到此否曰亦須稍嚴肅則可不然則無下手處又曰但得身心收斂則自然和樂不是別有一箇和樂纔整肅則自和樂○胡氏曰程子以怠惰放肆對嚴厲而言於嚴厲上加太字蓋嚴厲亦不可無太嚴厲則不可爾○南軒張氏曰燕居時在衆人易以怠肆君子則未免矜持安有此氣象○慶源輔氏曰燕居閒暇無事之時故其容儀得以遂其舒緩而無迫遽之意其顏色得以全其愉怡而無勃如之變申申天天聖人燕居容色自然之符也○新安陳氏曰雖閒居時其德容亦自然中和如此此所以為聖人也聖人閒居中和之氣乃德性中和之符程子所謂自有中和之氣自自然也

○子曰甚矣吾衰也久矣吾不復夢見周公

又復扶反

孔子盛時志欲行周公之道故夢寐之間如或見之

至其老而不能行也則無復

扶又反下同

是心而亦無復

是夢矣故因此而自歎其衰之甚也

朱子曰據文勢甚矣吾衰也是

一句久矣吾不復夢見周公是一句惟其久不夢見所以見得是衰○新安陳氏曰此亦道不行之符兆自見於

吾身者○程子曰孔子盛時寤寐常存行周公之道

及其老也則志慮衰而不可以有為矣蓋存道者心

無老少之異而行道者身老則衰也

朱子曰夫子夢寐周公正是聖

人至誠不怠處然時止時行無所凝滯亦未嘗不灑落也故及其衰則不復夢亦可見矣若是合做底事

則豈容有所忽忘耶○問伊川以為不是夢見人只是夢寐常存行周公之道爾集註則以為如或見之不知果是如何曰想是有時而夢見既分明說夢見周公全道不見恐亦未安程子之意蓋嫌於因思而夢者故為此說其義則精矣然恐非夫子所言之本意也○問孔子夢周公若以聖人欲行其道而夢之耶則是心猶有所動若以壯年道有可行之理而夢之耶則又不應虛有此朕兆也曰聖人曷嘗無夢須看他與周公契合處如何不然又不見別夢一箇人也聖人之心自有箇勤懇惻怛不能自己處自有箇脫然無所繫累處要亦正是以此卜吾之盛衰○問夢周公是真夢否曰當初思欲行周公之道時必亦是曾夢見曰恐涉於心動否曰心本是箇動物怎教他不動夜之夢猶晝之思也思亦是心之動處但無邪思可矣夢得其正何害心存這事便夢這事○問夫子未嘗識周公烏得而夢之曰今有人夢見平生



所不識之人云是某人者蓋有之○不是孔子衰是時世衰聖人與天地相應若人要用孔子必不教他衰如武王太公皆八九十歲○戴少望謂顏淵死聖人觀之人事鳳不至圖不出聖人察之天理不夢周公聖人驗之吾身然後知斯道之果不可行而天之果無意於斯世也這意思也好○吾不復夢見周公自是箇證非如此當聖人志慮未衰天意雖定八分猶有兩分運轉故也做得周公事遂夢見之非以思慮也要之聖人精神血氣與時運相為流通到鳳不至圖不出明主不興其證非自是恁地○胡氏謂聖人誠存則其夢治他人思慮紛擾則所夢亦亂或邪或正與旦晝之所為等爾善學者既謹其言動而又必驗諸夢寐之間也○南軒張氏曰夫子夢見周公之心周公思兼三王之心也

# ○子曰志於道

志者心之所之之謂

新安陳氏曰所之之往也

道則人倫日用之

間所當行者是也

朱子曰志道如講學力行皆是

知此而心必之焉

則所適者正而無他岐之惑矣

朱子曰志於道志字如有向望求索之意

大學格物致知即其事也又曰志於道不是只守箇空底須是至誠懇惻念念不忘所謂道者只是日用當然之理事親必要孝事君必要忠以至事兄而弟與朋友交而信皆是道也志於道者正是謂志於此也○胡氏曰道猶路也故適字他岐字皆自路言之○新安陳氏曰知此二字是朱子說志道以前事必知道而後志向在道即知止而後有定知至善之所在而後志有定向也

據於德

據者執守之意德則行道而有得於心者也得之於

心而守之不失則終始惟一而有日新之功矣

朱子曰德

是得這物事於我故事親必孝必不至於不孝事君必忠必不至於不忠若今日孝明日又不孝今日忠明日又不忠是未有得於我不可謂之德惟德是有得於我者故可據守之也若是未有得於我則亦無可據者○問據於德曰如孝便是自家元得這孝道理非從外旋取來據於德乃是得這基址在這裏○德是心得此道如欲為忠而得此忠欲為孝而得此孝既得之亦會失了須當照管不要失了○新安陳氏曰未得之志在必得之既得之方有可據守但又在守之固爾

依於仁

依者不違之謂仁則私欲盡去而心德之全也工夫至此而無終食之違則存養之熟無適而非天理之

流行矣

朱子曰依如依乎中庸之依相依而不捨之意此心常在不少有走作無物欲之累而

純乎天理道至此亦活德至此亦活○德是逐件上理會底得寸守寸得尺守尺仁是全體大用常依靠處志道據德而有一息之不仁便間斷了○據德是因事發見如因事父有孝因事君有忠依仁是本體不可須臾離底又是據於德底骨子○陳氏曰志道是一心向聖人路上行據德是志道工夫成向之所志者今皆實得於己如有物可執據依仁則據德工夫熟天理與心為一矣據如手執杖依如身著衣杖容有時而離手衣則不容須臾離身一節密一節也○西山真氏曰道者衆理之總名德則行衆理而得

於心者仁則心之全德也志乎道而弗他可謂知所向矣仁則歸宿之地而用功之親切處也

## 游於藝

游者玩物適情之謂

胡氏曰玩物本非美辭然以六藝為物而玩之非喪志之物也

○陸氏曰游如人之游觀有時而為之

藝則禮樂之文射御書數之法

皆至理所寓而日用之不可闕者也朝夕游焉以博

其義理之趣則應務有餘而心亦無所放矣

胡氏曰藝亦日

用之不可無者乃是理之妙散於日用間苟有未通亦為全體之累

○此章言人之為

學當如是也蓋學莫先於立志志道則心存於正而

不他據德則道得於心而不失依仁則德性常用而

物欲不行

慶源輔氏曰天理人欲不兩勝一盛則一衰也

游藝則小物不遺

而動息有養

慶源輔氏曰不外物以求理而常玩物理以養性

學者於此有

以不失其先後之序輕重之倫焉則本末兼該內外

交養日用之間無少間

去聲 逆

而涵泳從

七容反容

忽不自知其入於聖賢之域矣

慶源輔氏曰先後之序謂道德仁藝之序

輕重之倫謂志據依游之倫先者重後者輕也本與內謂道德仁未與外謂藝在彼之序雖有先後在我之倫雖有輕重而未嘗偏廢所謂兼該而交養也日用之間如是用功無少間隙涵泳從容於義理事物

之間則將優游饜飫而忽不知其入於聖賢之域矣  
○朱子曰志於道方是要去做方是事親欲盡其孝  
事兄欲盡其弟方是恁地至據於德則事親能盡其  
孝事兄能盡其弟便自有這道理了却有可據底地  
位雖然如此只是就事上逐件理會若不依於仁  
則不到那事時此心便沒頓放處依於仁則自朝至  
暮此心無不在這裏連許多德總攝貫穿都活了雖  
然藝亦不可不去理會如禮樂射御書數一件事理  
會不得此心便覺滯礙惟是一一去理會這道理脉  
絡方始一一流通無那箇滯礙因此又却養得這道  
理以此知大則道無不包小則道無不入小大精粗  
皆無滲漏皆是做工夫處故曰語大天下莫能載語  
小天下莫能破○志者心之所之道者當為之理為  
君有君之理為臣有臣之理志於道留心於此理而  
不忘也德者得也既得之則當據守而弗失仁者人  
之本心也既有所據守又當依於仁而不違如所謂

君子無終食之間違仁是也游於藝一句比上三句稍輕然不可大段輕說如上蔡云有之不害為小人無之不害為君子則是太輕了古人於禮樂射御書數等事皆至理之所寓游乎此則心無所放日用之間本末具舉而内外交相養矣○自志道至依仁是從粗入精自依仁而游藝是自本兼末○藝是小學工夫若論先後則藝為先三者為後若論本末則三者為本而藝為末習藝之功固在先游者從容潛玩之意又當在後文中子云聖人志道據德依仁而後藝可游也此說得自好○問道為義理之總名何也曰道以人所共由而得名若父子之仁君臣之義者是也曰德者己之所自得何也曰若為父子而得夫仁為君臣而得夫義者是也曰其志之據之何也曰潛心在是而期於必至者志也既以得之而謹守不失者據也曰不違仁者奈何曰吾於顏子之事既言之矣收闕六藝之目與所以游之之說曰五禮吉凶



軍賓嘉也六樂雲門大咸大韶大夏大濩大武也五射曰白矢參連剡注襄尺井儀也五馭鳴和鸞逐水曲過君表舞交衢逐禽左也六書象形會意指事轉注假借諧聲也九數方田粟米差分少廣商功均輸方程贏不足旁要也是其名物度數皆有至理存焉又皆人所日用而不可無者游心於此則可以盡乎物理周於世用而其雍容涵泳之間非僻之心亦無自而入之矣蓋志據依游人心之所必有而不能無者也道德仁藝人心所當志據依游之地而不可易者也以先後之次言之則志道而後德可據據德而後仁可依依仁而後藝可游以疎密之等言之則志道者未如德之可據據德者未如仁之可依依仁之密乎內又未盡乎游藝之周於外也詳味聖人此語而以身體之則其進為之序先後疎密皆可循序以進而日用之間心思動作無復毫髮之隙漏矣○勉齋黃氏曰道者義理之總名德者吾身所學而有得

之善仁者本心之德藝者六藝之事是四者皆人所不可不留意者但三者最重而藝稍輕四者之序則志者向之而不忘據者守之而不失依者隨之而不離是三者皆不可須臾捨也游則若用力若不用力而已上三者則互舉並行而不相悖游藝則有不必專心致志耳○問志於道一章古者八歲即教之以六藝之事明為學之所當先也今於此章未言之而朱子復以為學者於此當求其先後之序輕重之倫似以藝為可後抑志道據德依仁是大學之事而游藝乃大學之極功耶潛室陳氏曰此却有首尾本末與前章別教之六藝小學之初事游於藝又成德之餘功小學之初習其文成德之游適於意生熟滋味迥別○胡氏曰道德仁所當先藝可以少後志據依所當重游可以少輕務本而不廢其末事內而不忽乎外以其先後輕重之倫序而言固不無差別以其本末兼該内外交養而言則又未嘗不相資也○雙

峯饒氏曰志道如人行路據德如行路而有宿泊處依仁則又就宿泊處漸漸立得家計成却安居了游藝如居家有時出遊也須游於藝若游從別處去則出乎道德仁之外而為放心矣○新安陳氏曰志道據德而依於仁則本之立於內者既粹由此而復游於藝則末之該於外者不遺能深用功於本而以餘功及其末則內外交養而體用益貫矣

○子曰自行束脩以上吾未嘗無誨焉

脩脯也十脰

他昂反

為束古者相見必執贄以為禮

禮曲

禮下凡擊與贄同天子鬯諸侯圭卿羔大夫鴈士雉庶人之擊匹鄭氏音未匹即鷩也童子委擊而退擊之言至也童子委擊而退不與成人為禮也野外軍中無擊以纓拾矢可也纓馬繫纓也拾射獲也婦人

之擊棋棊

東脩其至薄者

胡氏曰在禮無以東脩為

脯脩棗栗不出境少儀曰其以乘壺酒束脩一犬穀梁傳曰束脩之問不行境中則是亦有以此為禮不但婦人用脯脩為贄也然比羔鴈為薄故曰至薄○邢氏曰此禮之薄者厚則有玉帛之類故云以上以包之○齊氏曰漢諸王致禮於其傅猶曰束脩蓋古禮也

人之於人無不欲其入於善但不知來學則無往教

之禮

記曰禮聞來學不聞往教

故苟以禮來則無不有以教之也

問束脩始相見之禮也人苟以禮來聖人未嘗不誨之蓋辭氣容色之間何莫非誨也固不保其往耳朱子曰誨之一字恐未說到辭氣容色之間亦未有不保其往之意恐不應於此遽及之也當詳玩之○胡

氏曰人之有生同具此理雖以氣稟物欲之累而趨於惡然皆可反而之善聖人仁天下之心曷嘗不欲啓其為善之塗哉惟自暴自棄在聖人亦無如之何故有不往教之禮執贄而來禮雖至薄意則可取故未嘗不教之也○慶源輔氏曰聖人之教雖不輕棄人亦不苟授人仁義並行而不相悖也但聖人之心其愛人也終無窮已而其責人也終不至於太甚爾

○子曰不憤不啓不悱不發舉一隅不以三隅反則不

復也

憤房粉反悱芳匪反復扶又反

憤者心求通而未得之意悱者口欲言而未能之貌

慶源輔氏曰心求通而未得通則其意憤然而不能自己憤有鬱懣之意口欲言而未能言則其貌悱然

而不能自伸惟者屈抑之貌

啓謂開其意發謂達其辭

雙峯饒氏曰啓如啓

戶畧開之也發如弩之張而為之發其機

物之有四隅者舉一可知其三

反者還以相證之義復再告也

華陽范氏曰憤則其慮也深惟則其進也

勇因而啓發之則其人必自得矣孟子曰君子之所  
以教者五有如時雨化之者顏子是也有成德者有  
達材者有答問者憤惟之類是也有私淑艾者舉一  
隅之類是也○朱子曰惟非全不曉也曉得三五分  
只是說不出學者至憤惟時其心已畧畧通曉但心  
已喻而未甚信口欲言而未能達故聖人於此啓發  
之舉一隅其三隅須是學者自去理會舉一隅而不  
能以三隅反是不能自用力者夫子所以不再舉也  
○南軒張氏曰此聖人教人之方也學貴於思思而  
後有得憤惟者思慮積久辭而未暢誠意懇切形於

外也憤則見於辭氣悱則見於顏色於是而啓其端發其蔽則庶幾其聽之專而感之之深也然告之亦舉一隅耳必待其以三隅反而後復之此古之教者所以為從容而使人繼其志之道也若不以三隅反則是未能因吾言而推類苟遽以復之則於彼亦無力矣

上章已言聖人誨人

不倦之意因并

去聲

記此欲學者勉於用力以為受教

之地也

新安陳氏曰聖人固不倦於教亦不輕於教學者無受教之地教之必不入也

○程

子曰憤悱誠意之見

賢遍反

於色辭者也

顏色辭氣

待其誠

至而後告之既告之又必待其自得

以三隅反

乃復告爾

朱子曰憤悱便是誠意到不憤悱便是誠不到

又曰不待憤悱而發則知之

不能堅固待其憤悱而後發則沛然矣

問程子云待憤悱而後發

則沛然矣如何有沛然底意思朱子曰此正所謂時雨之化譬如種植之物人力隨分已加但正當那時節欲發生未發生之際却欠了些子雨忽然得這些子雨來生意豈可禦也○慶源輔氏曰不待憤悱而發是強聒之耳必待憤悱而發則猶水之流壅遏於此有以決之則沛然而往莫能禦矣○新安陳氏曰不憤悱則不啓發不以三隅反則不復朱子作兩節對說程子只作一串說

○子食於有喪者之側未嘗飽也

臨喪哀不能甘也

朱子曰未嘗飽有食不下咽之意○厚齋馮氏曰檀弓記此蓋古禮

然也是書所記禮儀多合禮經當世不行而夫子舉行之故門人以為記耳



子於是日哭則不歌

哭謂弔哭一日之內餘哀未忘自不能歌也

朱子曰  
聖人不

成哭了便驟去歌如四時也須漸漸過去聖人之心如春夏秋冬不遽寒燠故哭之日自是不能遽忘○子於是日哭則不歌不要把一箇誠字包却須要識得聖人自然濃厚不輕浮底意思○南軒張氏曰臨喪則哀食何由飽哭者哀之至歌者樂之著一日之間二者不容相襲若此也學者法聖人而勉之亦足以養忠厚之心也

○謝氏曰學者於此二者可見聖人情性

之正也能識聖人之情性然後可以學道

慶源輔氏曰在聖人

分上二者皆自然安行其情性之正莫非道也識之者可以學道○新安陳氏曰是日歌或遇當哭哀不

能已也是日哭縱或  
遇歌樂可以已也

○子謂顏淵曰用之則行舍之則藏惟我與爾有是夫

舍上聲  
夫音扶

尹氏曰用舍無與

預於已

朱子曰用舍由在  
別人不由得我

行藏安

於所遇

新安陳氏曰遇用我則安於行  
遇舍我則安於藏無固必也

命不足道也

朱子曰命只是尹氏添

顏子幾

平聲

於聖人故亦能之

此一腳本文非有此意  
程子曰孔子謂顏淵曰用之則行舍之則藏惟我與  
爾有是夫君子所性雖大行不加焉雖窮居不損焉  
不為堯存不為桀亡者也用之則行舍之則藏皆不  
累於已爾○朱子曰用之則行舍之則藏此八字極

要人玩味若他人用之則無可行舍之則無可藏惟孔子與顏淵先有此事業在己分內若用之則見成將出來行舍之則藏了他人豈有是哉故下文云惟我與爾有是夫有是二字當如此看用舍無預於已行藏安於所遇命不足道也蓋只看義理如何都不問那命了雖使前面做得去若義去不得也只不做所謂殺一不辜行一不義而得天下有所不為若中人之情則見前面做不得了方休方委之於命若使前面做得他定不肯已所謂不得已而安之命者也此固賢於世之貪冒無耻者然實未能無求之之心也聖人更不問命只看義如何貧富貴賤惟義所在謂安於所遇也如顏子之安於陋巷他那曾計較命如何○問用之則行舍之則藏竊意漆雕曾閔亦能之曰舍之則藏易用之則行難若開用之未必能行也聖人規模大藏時不止藏他一身煞藏了事譬如大船有許多器具寶貝撐去則許多物便都藏了衆

人便沒許大力量然聖人行藏自是脫然無所係累  
救世之心雖切然得做便做做不得便休他人使有  
此若未用時則切切於求行舍之則未必便藏耿直  
之向有書云三代禮樂制度盡在聖人所以用之則  
有可行某謂此固其可行之具但本領更全在無所  
係累處有許大本領則制度點化出來都成好物故  
在聖人則為事業眾人沒那本領雖盡得他禮樂制  
度亦只如小屋叔藏器具室塞都滿運轉都不得○  
此章專在兩箇則字上如可以仕則仕可以止則止  
之類孔顏於用舍行藏之間如霧則行潦則止○常  
人用之則行乃所願舍之則藏非所欲舍之則藏是  
自家命恁地不得已不奈何聖人無不得已不奈何  
底意何消更言命到得無可奈何處始言命聖人說  
命只為中人以下說如道之將行將廢命也此為子  
服景伯說得之不得曰有命是為彌子瑕說下一等  
人不知有命又一人知有命猶自去計較中人以

上便安於命到聖人便不消言命矣○厚齋馮氏曰  
道本期於用非獨善其身而已也然時不我用則有  
退藏而已用之而欲藏不仁也舍之而欲行不智也  
是時欲扶世立功名者知行而不知藏欲潔身遺世  
者知藏而不知行此夫子所以旁觀一世惟子淵與  
已同也說者乃謂淵不願仕是以其迹而不知其心  
也為邦之問槩可見矣○勉齋黃氏曰用之舍之存  
乎人則行則藏應乎已則無意無我可見矣用之行  
矣至舍之則藏舍之藏矣至用之則行則無必無固  
可見矣○雲峯胡氏曰用行舍藏玩集註及語錄一  
當就有字上看常人未必有此也二當就則字上看  
用舍在人而聖人無所必也三當合兩句互看徇物  
者忘義徇祿用之雖行而舍之未必藏絕  
物者潔身亂倫舍之雖藏而用之未必行

# 子路曰子行三軍則誰與

萬二千五百人為軍大國三軍子路見孔子獨美顏

淵自負其勇意夫子若行三軍必與已同

朱子曰子路此問雖

無私意然猶

有固心之心

子曰暴虎馮河死而無悔者吾不與也必也臨事而懼

好謀而成者也

馮皮冰反  
好去聲

暴虎徒搏馮河徒涉

新安陳氏曰徒徒  
手而無所持也

懼謂敬其事

成謂成其謀言此皆以抑其勇

上三句

而教之

下二句

然

行師之要實不外此子路蓋不知也

問子行三軍則  
誰與朱子曰三

軍要勇行三軍者要謀既好謀然須要成事蓋人固有  
好謀而事不成者却亦不濟事又問謀在先成在  
後成非勇亦不能決曰然○子行三軍則誰與宜作  
相與之與非許與之與好謀而成人固有好謀者然  
疑貳不決往往無成者多矣孔子行三軍其所與共  
事者必臨事而懼好謀而成者也○好謀而成既謀  
了須是果決去做教成若徒謀而不成何益於事所  
謂作舍道旁三年不成者也臨事而懼是臨那事時  
又須審一審蓋閑時已自思量都是了都曉得了到  
臨事時又更審一審這懼字正如安而後能慮底慮  
字相似此本為行三軍而發故就行師觀之尤見精  
密○南軒張氏曰臨事而懼戒懼於事始則所以為  
備者周矣好謀者或失於寡斷好謀而成則思慮審  
而其發也必中矣敬戒周密如此古之人所以能成  
天下之事而不失也豈獨可行三軍而已哉○勉齋  
黃氏曰臨事而敬懼則有持重謹畏之心好謀而圖

成則有周悉萬全之計敬其事則無忽心無情氣臨  
事必能戒懼非怯懦而恐懼也成其謀則不妄動不  
亟取於事必有一定之謀既成而不愆於素自無僥  
倖速成之弊也無非抑其血氣之勇而教之以義理  
之勇

馬 ○謝氏曰聖人於行藏之間無意無必其行非  
貪位其藏非獨善也若有欲心則不用而求行舍之

而不藏矣

雙峯饒氏曰用之不行是好避底人舍之不藏是好進底人自有兩樣謝氏謂不用

求行舍之不藏只說得一邊

是以惟顏子為可以與

音預

於此子路

雖非有欲心者然未能無固必也至以行三軍為問

則其論益卑矣

胡氏曰子路勇不自遏故有是問乃不用而求行舍之而不藏者

夫



子之言蓋因其失而救之夫

扶音

不謀無成不懼必敗

小事尚然而况於行三軍乎

○子曰富而可求也雖執鞭之士吾亦為之如不可求

從吾所好

好去聲

執鞭賤者之事

新安倪氏曰太史公云假令晏子尚在願為之執鞭其言本此

設言

富若可求則雖身為賤役以求之亦所不辭然有命

焉非求之可得也則安於義理而已矣何必徒取辱

哉

陳氏曰此章為中人以下假設言之耳命所以安中人義所以責君子

○蘇氏曰聖

人未嘗有意於求富也豈問其不可哉為此語者

特以明其決不可求爾楊氏曰君子非惡

去聲

富貴而

不求以其在天無可求之道也

朱子曰上句是假設之辭下句方是正意

下句說從吾所好便見上句執鞭之士非所好矣更味而字雖字亦字可見文勢重在下句也須要仔細看富而可求也一句上面自是虛意言而可求便是富本不可求矣此章最見得聖人言語渾成底氣象須要識得○南軒張氏曰夫子謂富不可求者正於義不可故耳言使其於義而可則雖執鞭之事亦有時而可為矣其如義不可求何則始從吾所好而已吾所謂好者義是也然則所安以義而命蓋有不言者矣○慶源輔氏曰蘇氏發得此章語脉分明楊氏又說得聖賢所以不求富貴之理確實二說相須其

義始

備

○子之所慎齊戰疾

齊側皆反

齊之為言齊

如字下同

也將祭而齊其思慮之不齊者以

交於神明也

禮祭統及時將祭君子乃齊側皆反齊之為言齊如字下同也齊不齊以致齊

者也誠之至與不至神之享與不享皆決於此戰則衆

之死生國之存亡繫焉疾又吾身之所以死生存亡

者皆不可以不謹也

楊氏曰夫子齊必變食行三軍必臨事而懼康子饋藥未達不

敢嘗觀此則其慎可見

○尹氏曰夫子無所不謹弟子記其大

者耳

慶源輔氏曰聖人之心不待操而常存豈有不謹之時不謹之事哉特於此三者尤致謹故弟

子記以

垂教

○子在齊聞韶三月不知肉味曰不圖為樂之至於斯

也

史記三月上有學之二字

新安陳氏曰學之三月學之久因以忘味之久否則

三月字連下文無意味矣

不知肉味蓋心一於是而不及乎他也

曰不意舜之作樂至於如此之美則有以極其情文

之備

記曰知禮樂之情者能作識禮樂之文者能述○慶源輔氏曰文聲音也情實也

而不

覺其歎息之深也蓋非聖人不足以及此○范氏曰  
韶盡美又盡善樂之無以加此也故學之三月不知  
肉味而歎美之如此誠之至感之深也

朱子曰子聞韶音學之三

月不知肉味學之一節不知如何今正好看其志肉味處這裏便見得聖人之樂如是之美聖人之心如是之誠又曰聖人聞韶須是去學不鮮得只恁休了學之亦須數月方熟三月大約只是言其久不是真箇足頭九十日至九十一日便知肉味想見韶樂之美是能感動人是能使人視端而行直某嘗謂今世人有目不見先王之禮有耳不得聞先王之樂此大不幸也○問孔子聞韶學之三月不知肉味聖人殆亦固滯不化當食之時又不免心不在焉之病若何曰主一無適是學者之功聖人行事不可以此求之

也更是舜之樂盡善盡美而孔子聞之深有所契於心者所謂得志行乎中國若合符節是以學之三月而不自知其忘味也○問心不在焉則食而不知其味是心不得其正也然夫子聞韶三月何故不知肉味曰也有時如此所思之事大而飲食不足以奪其心也且如發憤忘食吾嘗終日不食皆非常事以其所憤所思之大自不能忘也○問程子改三月為音字如何曰彼以一日聞樂而三月忘味聖人不當固滯如此故爾然以史記考之則習之三月而忘肉味也既有音字又自有三月字則非文之誤矣蘇氏說亦得之蘇氏曰孔子之於樂習其音知其數得其志知其人其於文王也見其穆然而深思見其高望而遠志見其黯然而黑頎然而長其於舜也可知是以三月而不知肉味○慶源輔氏曰夫子之學韶樂非但有以極其聲容節奏而已併當與大舜無不幘載之德當時雍熙平成之治所謂盡善盡美之實而得

之不翅如身有其事親歷其時也則其誠意之深而見於歎息者如此誠非聖人不足以及是固非常情之所能測也○厚齋馮氏曰舜之後封於陳為之後者得用先代之樂自陳敬仲奔齊而韶樂有傳當是時魯具四代之樂然恐不無差舛韶之來最遠而獨得其傳於今夫子故曰韶盡美矣又盡善也殆謂是歟季札在魯觀韶雖極稱贊未必如在齊之善夫子是以學之而忘味之久○新安陳氏曰舜以上聖之德當極治之時作為韶樂羣聖之樂無以加於此者故夫子聞其音而樂之忘味而深歎美如此想如親見虞舜之聖身在雍熙之時契之以心而非徒聞之以耳也又按論語於韶凡三言之意者聞韶而學之最先謂盡美盡善善次之告

顏子以韶舞其最後歟

○冉有曰夫子為衛君乎子貢曰諾吾將問之

為去聲

為猶助也衛君出公輒也靈公逐其世子蒯

苦怪反

贖

五怪反

公薨而國人立蒯贖之子輒於是晉納蒯贖而

輒拒之時孔子居衛衛人以蒯贖得罪於父而輒嫡

孫當立故冉有疑而問之諾應辭也

朱子曰子以兵拒父是少不

順自不須疑而問冉有疑夫子為衛君者以嫡孫承重之常法言之則輒於義或當立也故疑夫子助之

入曰伯夷叔齊何人也曰古之賢人也曰怨乎曰求仁而得仁又何怨出曰夫子不為也

伯夷叔齊孤竹君之二子其父將死遺命立叔齊父



卒叔齊遜伯夷伯夷曰父命也遂逃去叔齊亦不立

而逃之國人立其中子其後武王伐紂夷齊扣馬而

諫武王滅商夷齊耻食周粟去隱於首陽山遂餓而

死史記武王載木主號為文王東伐紂伯夷叔齊叩馬而諫曰父死不葬爰及干戈可謂孝乎以臣弑

君可謂仁乎左右欲兵之大公曰此義人也扶而去之武王已平殷亂天下宗周而伯夷叔齊耻之義不

食周粟隱於首陽山即雷首山之陽在河中府河東縣采薇而食之遂餓而死怨猶悔也君

子居是邦不非其大夫况其君乎荀子子道篇子路問曰魯大夫練而

沐禮耶練小祥也孔子曰吾不知也子路出謂子貢曰吾以夫子為無所不知夫子徒有所不知由問魯

大夫練而沐禮耶夫子曰吾不知也子貢曰吾將為  
汝問之問曰練而沐禮耶孔子曰非禮也子貢出謂  
子路曰夫子無所不知汝問  
非也禮居是邑不非其大夫  
故子貢不斥衛君而以

夷齊為問夫子告之如此則其不為衛君可知矣

軒南

張氏曰子貢微其辭以測  
聖人之旨可謂善為辭矣

盖伯夷以父命為尊叔齊

以天倫為重其遜國也皆求所以合乎天理之正而

即乎人心之安

雙峯饒氏曰兼此兩  
句方說得仁字盡

既而各得其志

焉則視棄其國猶敝跣

所爾  
反

爾何怨之有若衛輒之

據國拒父而唯恐失之其不可同年而語明矣

問二  
子之

遜使無中子二子不成委先君之國而棄之必有當  
立者朱子曰伊川說叔齊當立看來叔齊雖以父命  
終非正理恐只當立伯夷曰伯夷終不肯立奈何曰  
國有賢大臣必請於天子而立之不問其情願矣看  
來二子立得都不安以正理論之伯夷稍優○以天  
下之公義裁之則天倫重而父命輕以人子之分言  
之則又不可分輕重但各認取自家不利便處退一  
步便是夷齊得之矣○蒯賸與輒若有一人識道理  
各相避就去了今蒯賸欲入子以兵拒父是少不  
順議者以為當立公子郢不知郢不肯做蓋知其必  
有紛爭也使夫子為政必上告天王下告方伯拔郢  
立之斯為得正輒之逃當在靈公薨而夫人欲立之  
之時○求仁得仁只得不傷其本心而已二子不交  
讓則心不安心本仁纔傷著本心則不仁矣○雙峯  
饒氏曰仁者天地生物之心人得之而為不忍之心  
若伯夷以父命為尊是不忍違其父叔齊以天倫為

重是不忍先其兄若輒之拒蒯賸則是忍於抗其父  
 矣是可忍也孰不可忍也如何安得○雲峯胡氏曰  
 人心誰無天理能合乎天理之正方可即乎人心之  
 安乃謂之仁伯夷以父命為重是伯夷之心合乎天  
 理而後伯夷之心方安叔齊以天倫為重是叔齊之  
 心合乎天理而後叔齊之心方安集註下一安字便  
 見夷齊不怨若怨則不安矣輒之  
 拒父全無人心天理於心安乎

○程子曰伯夷叔

齊遜國而逃諫伐而餓終無怨悔

新安陳氏曰兼諫  
 代言所以廣其不

悔之  
 實

夫子以為賢故知其不與輒也

問子貢問衛君  
 事朱子曰若使

子貢當時徑問輒事不唯夫子或不答便做答時亦  
 不能如此詳盡若只問伯夷叔齊何人也曰古之賢  
 人也亦未見分曉所謂賢人如君子而不仁者有矣  
 亦如何便見得出處一時皆當豈無怨悔處只再問

怨乎便見得子貢善問纔說道求仁而得仁又何怨便見得夷齊兄弟所處無非天理蒯輒父子所向無非人欲二者相去奚啻砒砒美玉直截天淵矣○問子貢欲知為衛君何故問夷齊曰一箇是父子爭國一箇是兄弟讓國此是則彼非可知問何故又問怨乎曰此又審一審所以夫子言求仁得仁是就身上本原處說凡讓出於不得已便有怨夷齊之讓是合當恁地乃天理之當然又何怨大綱衛君底固為不是到此越見得衛君沒道理又問子欲正名是公子耶否曰此又是第二節事第一節須先正輒父子之名問輒尚在則如何正曰上有天子下有方伯他不當立如何不正○問子貢有怨乎之問何也曰夫子謂夷齊是賢人恐賢者亦有過之者於是問以決之看這事是義理合如此否如其不必讓而讓之則未必無怨悔之心矣夫子告以求仁而得仁者謂是合恁地若不恁地是去仁而失仁矣若衛君事則大不

然矣子貢所以知其必不為也○問伯夷不敢安嫡長之分以違君父之命叔齊不敢從父兄之命以亂嫡庶之義這便是求仁伯夷安於逃叔齊安於讓而其心舉無陞机之慮這便是得仁否曰然衛君便是不能求仁耳○問夫子以夷齊為賢則其不為衛君之意明矣而子貢復有怨乎之問至聞得仁之語然後知夫子之不為何耶曰夷齊之賢天下孰不知之子貢蓋不待夫子之言而知之矣然意二子雖賢而其所為或出於激發過中之行而不能無感慨不平之心則衛君之爭猶未為甚得罪於天理也故問怨乎以審其趣而夫子告之如此則子貢之心曉然知夫二子之為是非其激發之私而無纖芥之憾矣持是心以燭乎衛君父子之間其得罪於天理而見絕於聖人尚何疑哉故其所以必再問而後知所決也○慶源輔氏曰世俗知其一不知其二見其一節之或得而於其大義之乖則不知察也蒯瞶固得罪於

父矣而以輒言之則子獨可以拒父乎輒嫡孫固在所當立矣然上不稟命於天王下不受命於君父又豈可以擅有其國乎是故為國家者不可無君子之論而世俗之說未可遽以為信也○齊氏曰父子也兄弟也君臣也人之倫也三才之所以立也二子之交讓也所失者國而所得者父子弟兄之紀其非武王而餓以死也所舍者生而所取者君臣之義是皆脫然有見於富貴貧賤死生之外而一毫私己不與焉謂非仁乎冉求有見於夷齊之仁必有見夫輒之不仁知夷齊於人紀為有功必知輒為名教之所不容

○子曰飯蔬食飲水曲肱而枕之樂亦在其中矣不義

而富且貴於我如浮雲

飯扶晚反食音嗣  
枕去聲樂音洛

飯食之也。䟽食麤飯也。聖人之心渾去聲然。天理雖處

困極而樂亦無不在焉。

新安陳氏曰：他人視為困極，聖人樂無不在，自不知其困。

極其視不義之富貴如浮雲之無有，漠然無所動於

其中也。

朱子曰：聖人表裏精粗無不昭徹，其形骸雖是人，其實只是一團天理，所謂從心所欲不

踰矩，左來右去，盡是天理，如何不快活？○樂亦在其中。此樂與貧富自不相干，是別自有樂處。如氣壯底人過熱，亦不怕過寒，亦不怕氣虛，則為所動矣。○樂字在先，理會得樂後，方見不義而富貴於我，如浮雲

○程子曰：非樂䟽食飲水也。雖䟽食飲水不能改其樂也。不義之富貴視之輕如浮雲，然又曰：須知所樂。



# 者何事

朱子曰聖人之心無時不樂如元氣流行天地之間無一處之不到無一時之或息也豈

以貧富貴賤之異而有所輕重於其間哉夫子言此蓋即當時所處以明其樂之未嘗不在乎此而無所慕於彼耳記此者列此以繼衛君之事其亦不無意乎○富貴非指天位天職而言但言勢位奉養之感耳此等物若以義而得則聖人隨其所遇若固有之無鄙厭之心焉但以不義而得則不易我飯蔬飲水之樂耳○如浮雲只說不義之富貴視之如浮雲不以彼之輕易我之重若義而得富貴便是當得如何掉脫得如舜禹有天下固說道不與亦只恁地安處之又如所以長守貴也所以長守富也義當得之亦自當恁地保守堯命舜云天之歷數在爾躬允執其中四海困窮天祿永終豈是不要保守○孔顏之樂不必分不改是從這頭說入來在其中是從那頭說出來○南軒張氏曰崇高莫大乎富貴富貴本非可

以浮雲視也。惟其非義，則浮雲耳。○陳氏曰：欲知樂之實味，須到萬理明徹，私欲淨盡，後胸中灑然無纖毫窒礙，而無入不自得，處庶幾有以得之矣。又曰：樂在其中，與不改其樂，誠有間。但程子於此却用不改字，主意全別。其添一能字，而又繫於䟽食飲水之下，者是雖䟽食飲水，亦不能改聖人之樂，便見本然渾然之樂，元不曾動比之。顏子不改繫之，回也。之下是回不為簞瓢陋巷所改，語意輕重自不同矣。○雙峯饒氏曰：樂是聖人之所固有，富貴貧賤是時之適然。人不處富貴，則處貧賤；聖人之樂，處富貴則在富貴，中處貧賤則在貧賤。中然樂在富貴中，見得不分曉。在貧賤中方別出，故多於貧賤處說。○新安陳氏曰：孔顏所樂何事？及自有其樂，程子之引而不發者也。從事於博文約禮，庶得其所以樂。朱子發程子之未發者也。必於顏子樂處言，而不於孔子樂處言之者，知顏子之樂而後，可知孔子之樂。故以孔所以誘顏。

顏所以學孔之工夫於顏樂處言之也在中之云不求樂而樂在其中見其樂之安焉不以貧窶累其心而改其所樂微見其樂之勉焉

○子曰加我數年五十以學易可以無大過矣

劉聘君見元城劉忠定公

名安世字器之大名府元城人

自言嘗讀

他論加作假五十作卒蓋加假聲相近而誤讀卒與五十字相似而誤分也愚按此章之言史記作假我數年若是我於易則彬彬矣加正作假而無五十字蓋是時孔子年已幾平聲七十矣五十字誤無疑也孔子

世家孔子晚而喜易序彖繫象說卦文言讀易  
章編三絕曰假我數年若是我於易則彬彬矣

學易

則明乎吉凶消長

去聲

之理進退存亡之道

胡氏曰吉凶消長以

卦體言進退存亡以人事言

故可以無大過蓋聖人深見易道之

無窮為言此以教人使知其不可不學而又不可以

易而學也

去聲

朱子曰聖人一生學問未嘗自說無過至此境界方言無大過猶似有小過在

雖是謙辭然道理真實無窮盡期說者當看此等為  
聖人氣象○所謂大過如當潛不潛當見不見當飛  
不飛皆是過乾卦純陽固好大亨之中須利於貞正  
非正則過矣又如坤六二須知履霜有堅冰之漸要  
人恐懼脩省不知恐懼脩省則過矣無大過者為此  
自謙之辭以教學者深以見易道之無窮又曰無大

過是聖人不自足之意○聖人學易於天地萬物之  
理吉凶悔吝進退存亡皆見得盡自然無差失聖人  
說此數句非是謾然且恁地說聖人必是見得是如  
此方如此說○覺軒蔡氏曰進退存亡之正易之道  
也知進退存亡不失其正學易之道也聖人雖曰生  
知亦必有驗乎易蓋聖人之道即易之道也聖人進  
退存亡不失其正所謂先天而天弗違後天而奉天  
時者也豈有過差乎夫子謂加我數年則於學易也  
不敢易謂可以無大過則合於易也無甚差皆不敢  
當之謙辭也謂無甚差則為無差矣○聖人學易明  
乎天理之吉凶消長所以進退存亡而不失其正而  
人與天合矣尚何過之可言要之聖人所以謙辭者  
非是自以為聖而有意於謙蓋亦真見易道之無窮  
而有俛焉孳孳之意又因以教人使人知易道之不  
可以不學而又不可以易學○慶源輔氏曰易道無  
窮皆自然而然而非年高德邵心與理協默識神會未

易學也人之處世履於憂患之塗又不可以不學易故抑揚其辭以垂教如此學者察乎二者之間則知易固不可不學且以夫子之德與年而尚欲假之以數年則又見其不可以輕易而學耳○西山真氏曰聖人作易不過推明陰陽消長之理而已陽長則陰消陰長則陽消一消一長天之理也人而學易則知吉凶消長之理以陰陽對言則陽為善為吉陰為惡為凶獨言陽則陽自有吉凶蓋陽得中則吉不中則凶陰亦然以天理言則為消息盈虛以人事言則為存亡進退蓋消則虛長則盈如日中則昃月盈則虧暑極則寒寒極則暑此天道所不能已也人能體此則當進而進當退而退當存而存當亡而亡如此則人道得而與天合矣故孔子可以進則進可以退則退可以久則久可以速則速用之則行舍之則藏此孔子之身全體皆易也○雲峯胡氏曰朱子謂夫子言此以教人使人知夫子老且學易所謂無大過

者易占辭於吉凶悔吝之外屢以無咎言之大要只欲人無過故曰無咎者善補過也悔則過能改而至於吉吝則過不改而至於凶使人人皆知學易則皆可以無大過此夫子教人之深意也○新安陳氏曰加我數年味我之一辭則所謂無大過者夫子自謂之辭耳

○子所雅言詩書執禮皆雅言也

雅常也執守也詩以理情性

新安陳氏曰治之使情性得其正

書以

道政事

述帝王之政事

禮以謹節文皆切於日用之實故常

言之禮獨言執者以人所執守而言非徒誦說而已

也

朱子曰詩書尚是口說得底惟禮要當執守執禮亦是當時自有此名○雙峯饒氏曰禮有五禮夫

子所常言者只是言人日用所常執守之禮不可闕者爾若宗廟郊社朝覲會同非常所用者則講之有時亦不常及之也○雲峯胡氏曰誦說屬知執守屬行

○程子曰孔子雅素之

言止於如此若性與天道則有不可得而聞者要在

默而識之也

識音式謂不言而自得之

謝氏曰此因學易之語而

類記之

朱子曰古之儒者只是習詩書禮樂言執禮則樂在其中如易則掌於太卜春秋掌於史

官學者兼通之不是正業只這詩書大而天道之精微細而人事之曲折無不在其中禮則節文度數聖人教人亦只是許多事○慶源輔氏曰詩所以吟咏情性故誦之者可以理情性猶治也書所以紀載政事故誦之者可以道政事道猶述也禮所以著天理之節文故執之者可以謹節文謹謂毫釐有所必



計也情性在內者政事節文在外者政事節文雖在外而又有廣狹之殊然皆切於日用之實故夫子常言之又曰詩書雖假誦讀然後能知其義而達諸用禮則全在人執守而行之故禮獨言執也然詩書雖始假於誦讀然後亦必須見於所行禮固在於執守而行之然始亦不可不講讀之也○厚齋馮氏曰易道精微春秋紀變樂在有司非所常言也詩可以興觀羣怨以事君父書乃齊家治國平天下之常道禮又朝夕之所從事者皆切於日用常行之實故常言之○勿軒熊氏曰詩即樂也孔子言興於詩立於禮成於樂語伯魚學詩學禮可見平日常言不過如此前章學易則其晚年也

○葉公問孔子於子路子路不對

葉舒涉反

葉公楚葉縣尹沈諸梁字子高僭稱公也

新安陳氏曰楚子僭

王其臣  
皆僭

葉公不知孔子必有非所問而問者故子路

不對抑亦以聖人之德實有未易

去聲

名言者與

音余  
新

安陳氏曰一則葉公不足以知聖人  
一則子路自難以言語形容聖人

子曰女奚不曰其為人也發憤忘食樂以忘憂不知老  
之將至云爾

未得則發憤而忘食已得則樂之而忘憂以是二者

俛焉日有孳孳

音茲

而不知年數之不足但自言其好

去聲  
學之篤爾

禮表記小雅曰高山仰止景行行止子  
曰詩之好仁如此鄉道而行中道而廢

忘身之老也。不知年數之不足也。俛焉日有孳孳。斃而後已。○朱子曰：聖人未必有未得之事，且如此說。若聖人有這般事，他便發憤做將去。○忘食忘憂，是逐事上說；一憤一樂，循環代至，非謂終身只此一憤一樂也。逐事上說，故可遂言不知老之將至，而為聖人之謙辭。若作終身說，則憤短樂長，不可并連。下句而亦不見聖人自貶之意矣。然深味之，則見其全體至極純，亦不

已之妙，有非聖人不能及者。蓋凡夫子之自言類如

此學者宜致思焉。

朱子曰：發憤忘食，樂以忘憂，不知老之將至，云爾。泛說若是謙辭，然

聖人之為人，自有不可及處。直要做到底，不做箇半間不畧底人，非是有所因真箇或有所感發憤而至。於忘食所樂之至，而忘憂，蓋有不知其然而不自知其老之將至也。又如好古敏以求之，自是謙辭，學不

厭教不倦亦是謙辭當時如公西華子貢自能窺測  
聖人不可及處蓋聖人處已之謙若平易而其所以  
不可及者亦在其中矣○發憤忘食是發憤便能忘  
食樂以忘憂是樂便能忘憂更無些小係累無所不  
用其極但見義理之無窮不知身世之可憂歲月之  
有變也衆人縱如何發憤也有些無緊要心在雖如  
何樂終有些係累乎其中不怨天不尤人樂天安土  
安於所遇無一毫之私意聖人便是天聖人有此理  
天亦有此理故其妙處獨與之契合○聖人直是脫  
灑私欲自惹不著這兩句雖無甚利害細看來見得  
聖人超出乎萬物之表○南軒張氏曰子路以葉公  
不知聖人且欲擬其形容而未知所對也夫子之意  
則以為即其近者告之斯可矣夫子所言發憤忘食  
樂以忘憂不知老之將至者亦好學之至者也然則  
聖人之所以異於人者果獨在於好學耶蓋生知而  
好學則是其所為生知者固亦莫捨矣謂聖人所以

異於人者在於好學亦豈不可乎○雙峯饒氏曰憤與樂相反聖人發憤便至忘食樂便至忘憂是兩邊各造其極如寒到寒之極暑到暑之極故曰全體至極兩者循環不已所以不知老之將至此是聖人之心純乎天理別無他嗜好所以自然學之不厭故曰純亦不已全體說憤樂至極說忘食忘憂純亦不已說不知老之將至

○子曰我非生而知之者好古敏以求之者也

好去聲

生而知之者氣質清明義理昭著不待學而知也敏速也謂汲汲也○尹氏曰孔子以生知之聖每云好學者非惟勉人也蓋生而可知者義理爾若夫

音禮扶

樂名物古今事變亦必待學而後有以驗其實也

朱子

曰聖人此等語皆是移向下以教人亦是聖人看得地步濶自是猶有未滿足處所以其言如此非全無事實而但為設辭也○好古敏以求之聖人是生知而學者然其所謂學豈若常人之學也聞一知十不足以及盡之○聖人於義理合下便恁地固天縱之將聖又多能也敏求則多能之事耳其義理完具禮樂等事便不學也自有一副當但力可及故亦學之○聖人雖是生知然也事理會過無一之不講這道理不是只就一件事上理會見得便了學時要無所不學理會時却是逐件上理會去○南軒張氏曰門人見夫子之聖謂生而知之不可及也故夫子以是告之使果能好古敏以求之則是聖人亦豈不可希玩味辭氣其循循然善誘可謂至矣○勉齋黃氏曰聖人雖生知義理然其為道廣大無窮故未嘗有

自足之心亦必博學審問參之古人不能自己此其所以為聖人也○慶源輔氏曰孔子以生知之聖每云好學者諸家多以為勉人之辭故尹氏辨之以為生而可知者自然昭著之義理爾若夫禮樂名物古今事變亦必待學而後有以驗其實也又曰好古敏求非生知者不能既知其義理則自然敏於學以驗其實也故生而知之者義理也好古敏求者事實也理與事一貫知與行相資○雙峯饒氏曰生知是合下知得此理好古敏求是又於事物上參究此理○勿軒熊氏曰信而好古好古敏以求之信字敏字當玩

○子不語怪力亂神

怪異勇力悖

音亂

亂之事非理之正固聖人所不語鬼

神造化之迹

雙峯饒氏曰造化之迹指其屈伸往來之可見者言也天地造化之妙不可得

而見所可見者其屈伸往來之迹爾

雖非不正然非窮理之至有未易

去聲

明者故亦不輕以語

音御人也

新安陳氏曰神與怪不同故以怪力亂總

言表神而出之

○謝氏曰聖人語常而不語怪語德而不語

力語治

去聲

而不語亂語人而不語神

或問夫子於春秋紀災異戰伐

纂亂於易禮論鬼神今日不語何也朱子曰聖人平日常言蓋不及是其不得已而及之則於三者必有訓戒焉於神則論其理以曉當世之惑非若世人之徒語而反以惑人也然其及之亦鮮矣○問子不語怪力亂神集註言鬼神之神難明易惑而實不外人事鬼神之神在人事中如何見得曰鬼神只是二氣



之屈伸往來就人事中言之如福善禍淫便可以見鬼神道理論語中聖人不曾說此問如動靜語默亦是此理否曰固是聖人全不曾說這話與人這處無形無影亦自難說所謂敬鬼神而遠之只恁地說○南軒張氏曰聖人一語一默之間莫不有教存焉語怪則亂常語力則妨德語亂則損志語神則惑聽故聖人之言未嘗及此然就是四者之中鬼神之情狀聖人亦豈不言之乎特明其理使人求之於心而已若其事未嘗言之也○慶源輔氏曰異非常也勇力非德也悖亂非治也三者皆非正理而聖人之心廣大光明隱惡揚善自然不語及此至於鬼神雖非不正然乃造化之迹二氣之良能其理幽深非格物致知者而驟以語之則反滋其惑故亦不輕以語人然能知所以為人則知所以為鬼神矣○齊氏曰素隱行怪吾弗為之故不語怪好勇過我無所取裁故不語力身為不善君子不入故不語亂務民之義敬而

遠之故不語神○問孔子所不語而春秋所紀皆悖亂非常之事陳氏曰春秋經世之大法所以懼亂臣賊子當以實書論語講學之格言所以正天典民彝故所不語

○子曰三人行必有我師焉擇其善者而從之其不善者而改之

三人同行其一我也彼二人者一善一惡則我從其善而改其惡焉是二人者皆我師也

朱子曰人若以自脩為心則舉

天下萬物凡有感乎前者無不足以發吾義理之正善者固可師見不善者便恐懼脩省亦吾師也○雙峯饒氏曰此姑以一善一惡對言以見善惡皆吾師或兩人皆善則皆當從兩人皆惡則皆當改便是與

一人行亦有我師此則言外之意南軒張氏云一人之身有善有不善亦莫非吾師也

○尹氏

曰見賢思齊見不賢而內自省則善惡皆我之師進

善其有窮乎

汪氏炎祖曰尹氏以見賢思齊章合此章說蓋取思齊自省可足此章之義也

善固當從然不思與之齊未必能從不善固當改然不內自省則己有不善未必能改

○子曰天生德於予桓魋其如予何

桓魋宋司馬向

式亮反

魋也出於桓公故又稱桓氏魋

欲害孔子孔子言天既賦我以如是之德則桓魋其

奈我何言必不能違天害已

程子曰天生德於予此聖人極斷制以理○問

聖人見其事勢不可害已還以理度其不可耶朱子曰若以勢論則害聖人甚易唯聖人自知其理有終不能害者○史記孔子適宋與弟子習禮大樹之下黉伐其樹孔子去之弟子曰可以速矣子曰天生德於子桓黉其如子何遂之鄭疑遭伐樹遂微服去之弟子欲其速行而以此語之也聖人雖知其不能害已然避患未嘗不深避患雖深而處之未嘗不閒暇所謂並行而不悖也○問桓黉其如子何此便是聖人樂天知命處見定志確斷然以禮自信絕無疑忌顧慮之意曰是聖人自處處驗之已然而知其決不能害已也又問聖人既知天生德於我決無可害之理矣而避患又必周詳謹密者何耶曰患之當避自是理合如此衆人亦然不必聖人為然也○吳氏曰夫子平日未嘗以聖自居及遭匡人桓黉之難則曰天生德於子文不在茲乎辭氣毅然無復退託推讓之意蓋至是亦不能捨其聖矣一以德言一以道言

有此德則能任此道其實一而已矣○其如命何聽命於天也其如予何則天命在已而已與天為一矣故其論公伯寮也猶以廢與不可知之辭道之若匡人桓魋則為斷斷然自信之說

○子曰二三子以我為隱乎吾無隱乎爾吾無行而不與二三子者是丘也

諸弟子以夫子之道高深不可幾

平聲

及故疑其有隱

而不知聖人作止語默無非教也故夫子以此言曉

之與猶示也

朱子曰要緊只在吾無行不與二三子處須仔細認聖人無不與二三子處在

那裏凡日用飲食間皆要認得○所謂吾無隱乎爾者居鄉黨便恂恂在宗廟便便便與上大夫言便闇

閻與下大夫言便侃侃自有許多實事○新安陳氏曰作止語默四字所包甚闊作與語之為教人易知之止與默之亦為教所難知也

○程子曰聖人之道猶天然門弟子親炙而莫及之然後知其高且遠也使誠以為不可

及則趨向之心不幾於怠乎故聖人之教常俯而就之如此非獨使資質庸下者勉思企及而才氣高邁

者亦不敢躡易

去聲

而進也

問伊川言聖人教人常俯就若是掠下一著教人是

聖人有隱乎爾何也朱子曰道有大小精粗大者精者固道也小者粗者亦道也觀中庸言大哉聖人之道洋洋乎發育萬物峻極於天此言道之大處優優大哉禮儀三百威儀三千是言道之小處聖人教人

就其小者近者教人便是俯就然所謂大者精者亦只在此初無二致要在學者下學上達自見得耳在我則初無所隱也○慶源輔氏曰庸下者失之不及易以懈怠而止高邁者失之過易以陵躐而進懈怠者病在苦其難陵躐者病在忽其易今夫子自以為無隱且曰無行而不與二三子則庸下者不至病其難而發勉思企及之志高邁者不敢忽其易而致謹重密察之功在我者一施之在彼者各以其資之高下而有益焉是即聖道如天垂象昭然而有目者莫不見之驗也豈終於高遠而不可冀及邪

呂氏

曰聖人體道無隱與天象昭然莫非至教常以示人

而人自不察

延平李氏曰孔子之示人其道昭然常存乎動靜俯仰視聽頓挫營效之間而

未嘗隱也彼見之者自有淺深○朱子曰夫子嘗言中人以下不可以語上也而言性與天道則不可得

而聞想是不曾得聞者疑其有隱而不知夫子之坐  
作語默無不是這箇道理風霆流形庶物露生無非  
教也聖人雖教人灑掃應對這道理也在裏面○范  
陽張氏曰天何言哉四時行焉百物生焉使天徒類  
然在上何足以為天惟其不言而四時行百物生故  
凡春生夏長根莖枝葉一皆天理之所寓孔子於日  
用間視聽言動出入起居無非道之所在羣弟子由  
而不知習而不察所以疑聖人為隱故夫子指之曰  
吾無行而不與二三子者是丘也觀是丘之一言則  
知夫子平日機括盡於此而決之當時羣弟子自夫  
子一指之後皆知用意以觀聖人故鄉黨所載上而  
朝廷下而衣服飲食莫不屢書特書者正謂此爾○  
新安陳氏曰體道與鬼神體物而不可遺之體同道  
無形體可見聖人一身渾然此道動靜語默之間無  
非此道之所呈露無形體之道於聖人身上形見出  
來是所謂與道為體而無所隱於人也○汪氏曰鄉



黨一篇是門人有得於此言故記得詳密如此

○子以四教文行忠信

行去聲

程子曰教人以學文脩行而存忠信也忠信本也

子朱

曰教不以文無由入說與事理便是文詩書六藝皆文也如講說如何是孝弟只是文行所謂孝弟方是行又恐行之未誠實故又教以忠信到得為忠為信時全在學者自去做方是實事○此是表裏互說教人之道自外約入向裏去故先文後行而忠信者又立行之方也○文行忠信如說事親是如此事兄是如此雖是行之事也只是說話在須是自家體此而行之方是行蘊之於心無一毫不實處方是忠信可傳者只是這文若行忠信乃是在人自用力始得雖然若不理會得這箇道理不知是行箇甚麼忠信是

箇甚麼所以文為先又曰其初須是講學講學既明而後脩於行所行雖善然更須反之於心無一毫不實處乃是忠信○問子以四教何以有四者之序曰文便是窮理豈可不見之於行然既行矣又恐行之有未誠實故又教之以忠信也所以伊川言以忠信為本蓋非忠信則所行不誠故耳因問行有餘力則以學文何也曰彼將教子弟而使之知大槩也此則教學者深切用工也問然則彼正合小學之事與曰然文行忠信是從外做向內則以學文是從內做向外聖人言此類者多要人逐處自識得○西山真氏曰行有餘力則以學文是以力行為先子以四教文行忠信文者講學之事主乎知忠信者脩身之事主乎行此又以知為先此二章實相表裏正當合而觀之大抵致知力行二者不可闕一既知其理不可不行其事既行其事不可不知其理二者並進則為學之功至矣○雙峯饒氏曰聖人施教之序且先使學

者讀書講明義理故先之以文既曉得義理然後可以使之脩行故次之以行行是外面行底外面能行然後方可責其裏面誠若外面顯見處尚未能行況裏面隱微之地乎故忠信是結合處中庸先說智仁勇而後終之誠亦是此意○陳氏曰學文所以窮理脩行所以體是理於身存忠信所以萃是理於心○勿軒熊氏曰忠是實心就已上看信是實理就事物上看○雲峯胡氏曰教以學文脩行知行當俱盡也教以存忠信表裏當俱實也○新安陳氏曰學文者致知之事脩行者力行之事存忠信所以誠實於力行而忠其體信其用也所以謂之四教

○子曰聖人吾不得而見之矣得見君子者斯可矣

聖人神明不測之號君子才德出衆之名

朱子曰有德而有才

方見於用如有德而無才則不能為用亦何足為君子

子曰善人吾不得而見之矣得見有恒者斯可矣

恒胡登反

子曰字疑衍文恒常久之意張子曰有恒者不二其

心善人者志於仁而無惡

朱子曰善人是資質好底人自然無惡有恒只是把

捉得定又未到善人自然好處在然善人有恒皆未知學問者也○問善人是資質大段粹美其心常在於善道所以自不至於有惡有常者則是箇確實底人否曰是有常底也不到事事做得是只是有志於為善而不肯為惡耳善人則從來恁地好事事依本分但人多等級善人雖是資質好雖是無惡然不踐迹亦不入於室緣不甚曉得道理不可以道聖人只是恁地便住了○此但為思其上者而不可得故思

其次之意○雙峯饒氏曰聖人是天生底君子是學而成底善人是氣質好底有恒是有常守底次乎聖人者為君子次乎善人者為有恒

亡而為有虛而為盈約而為泰難乎有恒矣

亡讀為無

三者皆虛夸之事凡若此者必不能守其常也

問亡而為

有朱子曰正謂此皆虛夸之事不可以久是以不能常非謂此便是無常也○以亡為有以虛為盈以約為泰則不能常謂如我窮約却欲作富底舉止縱然時暫做得將來無時又做不得如此便是無常亡對有而言是全無虛是有但少約是就用度上說○張敬夫曰聖人君子以學

言善人有恒者以質言

新安陳氏曰以學言者兼乎質以質言者則未學者也

愚謂有恒者之與聖人高下固懸絕矣然未有不自  
有恒而能至於聖者也故章末申言有恒之義其示

人入德之門可謂深切而著明矣

朱子曰聖人也只是這箇道理但是

他理會得爛熟後似較聖樣其實只是這道理君子是事是做得去所謂君子不器善人則又不及君子只是知得有善有惡肯為善而不肯為惡耳有常者又不及善人只是較依本分○問此章曰吳氏魯氏說亦得之吳氏曰君子蓋有賢德而又有作用者特不及聖人爾若善人則粗能嗣守成緒不至於為惡而已非若君子之能有為也曾氏曰當夫子時聖人固不可得而見豈無君子善人有恒者乎而夫子云然者蓋其人少而思見之也及其見則又悅而進之曰君子哉若人凡此類當得意而忘言善人明乎善

者也有恒雖未明乎善亦必有一節終身不易者若本無一長而為有之狀未能克實而為盈之狀貧約而為泰之狀此亦妄人而已矣孟子所謂兩集溝澮皆盈其涸可立而待也烏能久矣曰有無虛實約泰之分奈何曰無絕無也虛則未滿之名耳二者兼內外學之所至事之所能而言約之與泰則貧富貴賤之稱耳為之云者作為如是之形作為如是之事者也為而無以繼則雖欲為有恒不可得矣○南軒張氏曰聖人者肖天地者也君子者具其體而未能克實者也故聖人不得而見得見君子斯可矣善人資稟醇篤無惡之稱有恒者則能謹守常分而已故善人不得而見得見有恒者斯可矣以善人之資而進學不已聖蓋可幾有恒而力加勉焉亦足以有至也若夫已無而以為有已虛而以為盈在約而以為泰則是驕矜虛浮不務實者其能以有恒乎未能有恒况可言學乎○勉齋黃氏曰亡為有虛為盈約為泰

三者誇大欺妄之意不實之謂也人惟實也則始終如一故能有常今其人不實如此又豈敢望其有常哉夫子稱聖人君子善人不可得見而卒及乎此又以明夫有恒者之亦不可見也○慶源輔氏曰學至於聖人則造乎極而無以復加矣君子雖未及乎聖人然其才德超出於衆則其為學亦以成矣善人雖未必知學然其資質之美自然至於善而不至於惡至於有恒者則資質又有不及善人但亦純固而不務虛誇守其一端則終身不易者也○新安陳氏曰入德有門戶進德有闕與自有恒而入學而充之以造於極有至聖域之理虛誇無恒者尚無入德之門戶况敢望進德造於闕與乎末三句言不常之失以明有恒之義學者以希聖為標準而能以有恒為入門其庶幾焉

○子釣而不綱弋不射宿

射食亦反



網以大繩屬

音燭

網絕流而漁者也弋以生絲繫矢而

射也宿宿鳥

勿軒熊氏曰多能鄙事此亦可見

○洪氏曰孔子少

去聲

貧賤為養

並去聲

與祭或不得已而釣弋如獵較

音角

是

也然盡物取之

絕流而漁

出其不意

射宿

亦不為也此可見

仁人之本心矣

慶源輔氏曰不曰聖人之本心而曰仁人之本心據此事只可謂之仁然

曰本心則聖人亦不能加毫末於此矣○新安陳氏曰於取物之中有愛物之仁於此可見其本心待

物如此待人可知小者如此大者可知

南軒張氏曰聖人之心天

地生物之心也其親親而仁民仁民而愛物皆是心之發也然於物也有祭祀之須有奉養賓客之用則

其取之也有不得免焉於是取之有時用之有節若夫子之不絕流不射宿則皆仁之至義之盡而天理之公也使夫子之得邦家則王政行焉鳥獸魚鼈咸若矣若夫窮口腹以暴天物者則固人慾之私也而異端之教遂至於禁殺茹蔬殞身飼獸而於其天性之親人倫之愛反恣然其無情也則亦豈得為天理之公哉故梁武之不以血食祀宗廟與商紂之暴殄天物事雖不同然其悞天理以致亂亡則一而已

○子曰盖有不知而作之者我無是也多聞擇其善者而從之多見而識之知之次也

識音志

不知而作不知其理而妄作也

厚齋馮氏曰桑柔詩云予豈不知而作古

有此語

孔子自言未嘗妄作盖亦謙辭然亦可見其無

所不知也識記也所從不可不擇記則善惡皆當存之以備參考如此者雖未能實知其理亦可以次於

知之者也

朱子曰知以心言得於聞見者次之聞見皆欲求其多否則聞見孤寡不足以為學

夫擇字生於從字識則未便有從意故不言擇善聞見亦是互相發明不可泥看○多聞已聞得好話了故從中又揀擇多見只是平日見底事都且記放這裏○問不知而作作是迷作或只是凡所作事曰只是作事又曰聞見大畧爭不多較所聞畢竟多聞須別識善惡而從見則見得此為是彼為非則當識之他日行去不差也○未擇時則未辨善惡擇了則善惡別矣譬如一般物好惡夾雜在此須是擇出那好底擇去那惡底擇來擇去則自見得好惡矣○聞是聞前言往行從之是擇其尤善者而從之見是泛泛

見得雖未必便都從他然也記着他終始首尾得失  
○南軒張氏曰天下之事莫不有所以然不知其然  
而作馬皆妄而已聖人之動無非實理也其有不知  
而作者乎雖然知未易至也故又言知之次者使學  
者有所持循由其序而至焉多聞擇善而從多見而  
識其善雖未及乎知之至然知之次也擇馬識馬而  
不已則其知將日新矣○慶源輔氏曰夫子言此雖  
是護辭然於無所不通之聖自有不可掩者○新安  
陳氏曰集註全不說聞見二字其不可拘泥明矣學  
千祿章亦只總之云多聞見者學之博未嘗拘拘分  
別聞與見也

○互鄉難與言童子見門人惑

見賢  
遍反

互鄉鄉名其人習於不善難與言善惑者疑夫子不

當見之也

子曰與其進也不與其退也唯何甚人潔已以進與其  
潔也不保其往也

疑此章有錯簡人潔至往也十四字當在與其進也  
之前潔脩治也與許也往前日也言人潔已而來但  
許其能自潔耳固不能保其前日所為之善惡也但  
許其進而來見耳非許其既退而為不善也

依改正  
次序釋

五句蓋不追其既往

不保  
其往

不逆其將來

不與  
其退

以是心至

潔已以進

斯受之耳

與潔與進

唯字上下疑又有闕文

唯是全無意

大抵亦不為已甚之意○程子曰聖人待物之洪如

此

南軒張氏曰以互鄉之俗惡而童子又非得與先生長者抗禮者而夫子見之故門人惑焉夫子謂

其進之志則善與其進而志善也而不與其退而不善也若於進而志善之時以其退而不善而拒之則何甚也聖人之心天也其有已甚者乎則又反復言之謂凡人潔已以進則當與其潔耳固不可保其往也此所謂顯比王用三驅至公之心也○慶源輔氏曰人前日為不善而今日向善未可知今日向善而後日為不善亦未可知若追其既往又逆其方來則已甚而待人狹隘矣○厚齋馮氏曰童子年少未嘗深染於其習俗而不可轉移聖人何忍遽絕之孟子不為已甚之說蓋出於此

○子曰仁遠乎哉我欲仁斯仁至矣

仁者心之德非在外也放而不求故有以為遠者反

而求之則即此而在矣夫音扶豈遠哉○程子曰為仁

由己欲之則至何遠之有

朱子曰欲有好底如我欲仁可欲之謂善不是情欲

之欲○仁本固有欲之則至志之所至氣亦至焉○問斯仁至矣至若來至之意曰昔者亡之今忽在此如自外而至耳如易言來復實非自外而來也○孔門許多弟子聖人竟不曾以仁許之雖以顏子之賢而尚或違於三月之後而聖人乃曰我欲斯至蓋亦於日用體驗我若欲仁其心如何仁之至其意又如何又如非禮勿視聽言動蓋欲每事省察何者為禮何者為非禮而吾又何以能勿視勿聽若每日如此

讀書庶幾看得道理自我心而得不為徒言也○南軒張氏曰仁豈遠於人乎患人不欲之耳欲之斯至不曰至仁而曰斯仁至矣蓋仁非有方所而可往至之也欲仁而仁至我固有之也○覺軒蔡氏曰時人皆以仁道遠而難為故夫子以工夫之切近者勉而進之謂仁豈遠乎哉我欲仁斯仁至矣蓋仁者心之德纔一收斂則此心便在所以甚言其近且易不得他求也○慶源輔氏曰仁者心之德我固有之非在外也如手之執足之履目之視耳之聽不假外求欲之則至何遠之有而人不知反求而病其遠此夫子所以發此論也○雙峯饒氏曰欲仁仁至其至也固易其去也亦易須於既至之後常加操存之功方能不違仁也○新安陳氏曰斯字甚緊如時人斯其惟皇之極之斯即此二字貼斯字

○陳司敗問昭公知禮乎孔子曰知禮



陳國名司敗官名即司寇也

胡氏曰左氏傳註陳楚名司寇為司敗

昭

公魯君名稠

音

習於威儀之節當時以為知禮故司

敗以為問而孔子答之如此

孔子退揖巫馬期而進之曰吾聞君子不黨君子亦黨乎君取於吳為同姓謂之吳孟子君而知禮孰不知禮

取七

住反

巫馬姓期字孔子弟子名施

魯人

司敗揖而進之也相

助匿非曰黨禮不取同姓而魯與吳皆姬姓謂之吳

孟子者諱之使若宋女子姓者然

禮坊記取妻不取同姓以厚別也故

買妾不知其姓則卜之以此防民魯春秋猶去夫人之姓曰吳其死曰孟子卒○厚齋馮氏曰古者男子稱氏辨其族也女子稱姓厚其別也故制字姓從女百世而婚姻不通者周道也稱孔子時孔子在陳蓋記於陳也○慶源輔氏曰婦人稱姓周女曰姬宋女曰子齊女曰姜楚女曰芊是也○吳氏曰謂者何人謂之春秋哀十二年書孟子卒不書葬疑謂之孟子者魯人諱之而謂之吳孟子者當時譏誦之語也○新安陳氏曰不稱姬而冠之以吳終有不可掩者

巫馬期以告子曰丘也幸苟有過人必知之

孔子不可自謂諱君之惡又不可以取同姓為知禮

故受以為過而不辭○吳氏曰魯盖夫子父母之國  
昭公魯之先君也司敗又未嘗顯言其事而遽以知  
禮為問其對之宜如此也及司敗以為有黨而夫子

受以為過盖夫子之盛德無所不可也

慶源輔氏曰  
且以有過而

人知為幸又可垂教  
以警夫獲疾忌醫者

然其受以為過也亦不正言其

所以過初若不知孟子之事者可以為萬世之法矣

問昭公取同姓之事若天王舉法則如何斷朱子曰  
此非昭公故為之也當時吳盛強中國無伯主以齊  
景公猶云既不能令又不受命涕出而女於吳若昭  
公亦是藉其勢不得已之故非貪其色而然也天王

舉法則罪固不免亦須原情自有處置况不曰孟姬而曰吳孟子則昭公亦已自知其非矣○南軒張氏曰他國之大夫問吾國之君知禮與否則但可告之以知禮而已及巫馬期以司敗之言告則又豈可謂娶同姓為知禮乎若言為君隱之意則淺露已甚而失前對之本意矣故但引已之過而已然而娶同姓之為非禮其義固已在其中矣聖人辭氣之間其天地造化與○吳氏曰夫子受以為過則昭公不得為知禮可知隱諱者臣子之私是非者天下之公夫子答司敗與期可謂兩盡其旨矣葉公以證父之惡為直司敗以隱君之惡為黨彼蓋知直之為公黨之為私而於父子君臣之義蔑如也微夫子大道其隱乎○雲峯胡氏曰使夫子而直指君之非則自無君臣之禮使夫子而不自引已之過則遂無婚姻之禮何以為萬世之法哉

○子與人歌而善必使反之而後和之

和去聲

反復也必使復歌者欲得其詳而取其善也而後和

之者喜得其詳而與其善也

朱子曰子與人歌而善必使反之而後和之今

世間人與那人說話那人正說得好自家便從中截斷如云已自理會得不消說之類以此類看聖人是甚氣象與人歌且教他自歌一終了方令再歌而後和之不於其初歌便和恐混雜他不盡其意此見聖人與人為善○若不待其反而後和則他有善亦不得而知今必使之反之而後和之便是聖人不掩人善處○慶源輔氏曰詳謂首尾節奏之脩○雙峯饒氏曰子與人歌是與之同歌反者使之自歌和則己之自歌也○新安陳氏曰集註取與二字如孟子取諸人以為善是與人為善者也初則取之既取而許

與獎勸之

此見聖人氣象從

七容反

容誠意想至而其謙遜

審密不掩人善又如此盖一事之微而衆善之集有

不可勝

平聲

既者焉讀者宜詳味之

朱子曰聖人天縱多能其於小藝不

待取於人而後足乃欲得其詳如此其謙遜謹審可知也然若不待其曲終而遽和之則幾於伐已之能以掩彼之善矣故必俟其曲終以盡見其首尾節奏之善然後又使復歌而始和之則既不失其與人為善之意而又不掩其善也然此亦聖人動容周旋自然而中非有意於為之也抑又見其從容不迫不輕信而易悅之意○問于與人歌而善必使反之而後和之晦翁云盖一事之微而衆善之集有不可勝既者如何潛室陳氏曰必使復歌者既欲彰其善之實又欲暢其歌之情而後和之者示我樂善之無倦詠

歎而淫泆之也只一歌詩耳而意思綢繆容與若此豈非衆善之集乎○慶源輔氏曰氣象從容故謙遜誠意懇至故審密○雲峯胡氏曰此不過歌之善者爾夫子所以取之與之者如此則凡所以取人之善與人之善者可知矣

○子曰文莫吾猶人也躬行君子則吾未之有得

莫疑辭猶人言不能過人而尚可以及人未之有得

則全未有得皆自謙之辭而足以見言行去聲之難易

去聲緩急欲人之勉其實也慶源輔氏曰勉人為其實而不廢其文但有先後緩

急之序耳○雙峯饒氏曰躬行君子之道而有得則為君子之德矣○謝氏曰文雖聖

人無不與人同故不遜能躬行君子斯可以入聖故

不居猶言君子道者三我無能焉

朱子曰文莫吾猶人也莫是疑辭猶

今人云莫是如此否言文則吾與人一般如云聽訟吾猶人也若躬行君子則吾未之有得此與君子之道四丘未能一焉之意同○問此章曰於文言其可以及人足見其不難繼之意言其不能過人又見其不必工之意且合而觀之又見其雖不遜其能而亦不失其謙也於行言其未之有得則見其實之難焉見其必以得為效焉見其汲汲於此而不敢有毫髮自足之心焉一言之中而指意反覆更出互見曲折詳盡至於如此非聖人而能若是哉○雲峯胡氏曰此文字輕不過著於言辭者爾○新安陳氏曰文不在茲之文文字重此以文對躬行而言可見文為言而躬行為行故集註以言行之難易緩急釋之



○子曰若聖與仁則吾豈敢抑為之不厭誨人不倦則可謂云爾已矣公西華曰正唯弟子不能學也

此亦夫子之謙辭也聖者大而化之仁則心德之全

而人道之備也

勿軒熊氏曰聖則仁之熟而至於化矣聖非出於仁之外也○新安陳氏

曰此專言之仁包義禮智故為心德之全立人之道曰仁與義仁體而義用言仁則義在其中故為人道

之為之謂為仁聖之道誨人亦謂以此教人也

朱子曰他

也不曾說是仁聖但為之畢竟是箇甚麼誨人是箇甚麼○新安陳氏曰自為觀十五志學章可見教人觀博文約禮可見皆不外乎知行

然不厭不倦非已有之則不能所

以弟子不能學也

雲峯胡氏曰此雖夫子不敢當聖與仁之名而愈見夫子有聖與仁

之實○新安陳氏曰夫子雖不居仁聖之名而所行所教無非不息於仁聖之道不厭不倦即純亦不已也非已實有此仁聖之道則有時而厭倦矣

○晁氏曰

音潮名說之字以當道清豐人

時有稱夫子聖且仁者以故夫子辭之苟辭之而已焉則無以進天下之材率天下之善將使聖與仁為

虛器而人終莫能至矣

新安陳氏曰聖人之道若天下無一人能與於此是終為

虛器而無人能實之矣

故夫子雖不居仁聖而必以為之不厭

誨人不倦自處

上聲

也可謂云爾已矣者無他之辭也

公西華仰而歎之其亦深知夫子之意矣

朱子曰夫子固多謙

辭到得說抑為之不厭誨人不倦公西華便識得所以有正唯弟子不能學也之說便說道聖人有不讓處○其他人為之誨人不能無厭倦時唯聖人則不厭不倦正唯弟子不能學也言正是弟子不能學處這若不是公西華親曾去做來親見是恁地如何解恁地說○仁之與聖所以異者大而化之謂聖若大而未化之只可謂之仁此其所以異○南軒張氏曰夫子雖不居聖然玩味辭氣其所以為聖者亦可得而見矣夫盡人道聖人也為之不厭誨人不倦聖人之仁天之無疆也○慶源輔氏曰為之不厭者仁聖之實誨人不倦者仁聖之施非在己者有仁聖之德豈能如是公西華蓋即為之不厭誨人不倦而見夫子實全仁聖之道非學者所能效也○雙峯饒氏曰前以學不厭誨不倦為何有於我此却以二者自

任何也蓋前章是泛說所以雖非聖人之極至而亦不敢當此章是見人以仁聖歸之已既遜了第一第二等只得且承當第三等底事所以勉人也

○子疾病子路請禱子曰有諸子路對曰有之誅曰禱

爾于上下神祇子曰丘之禱久矣

誅力軌反

禱謂禱於鬼神有諸問有此理否誅者哀死而述其

行去聲下素行同之辭也

厚齋馮氏曰士有誅累生時德行以賜之命則誅周官六辭六曰誅

是也禱疾亦誅其功德故謂之誅云

上下謂天地天曰神地曰祇禱者

悔過遷善以祈神之祐也

朱子曰只是引此古語以明有禱之理非謂欲禱皇

天后土也。禱雖臣子之禮，其辭則述君父悔過遷善之意，以解謝鬼神之譴怒。無其理則不

必禱。既曰有之，則聖人未嘗有過，無善可遷，其素行

固已合於神明，故曰丘之禱久矣。

問聖人與天地合其德與鬼神合其

吉凶我即天地鬼神天地鬼神即我何禱之有朱子曰自他人言之謂聖人如此可也聖人之心豈以此自居惟味某之禱久矣一句語意深厚聖人氣象與天人之分自求多福之意可見○巖峯饒氏曰諫如哀公諫孔子是也古諫文之意蓋曰往者疾病時嘗禱爾于神祇矣而卒莫之救蓋哀其死之辭也○新安陳氏曰聖人素履無愧少壯迨老無非對越神明之時宜待疾病而後禱哉所謂禱久矣乃因子路引禱爾而言蓋又士喪禮疾病行禱五祀儀禮第十三篇註云謂門

戶竈行中雷盡孝子之情五  
祀博言之士二祀曰門曰行

盖臣子迫切之至情有

不能自己者初不請於病者而後禱也故孔子之於

子路不直拒之而但告以無所事禱之意

朱子曰在臣子則可

在我則不可聖人也知有此理故言我不用禱而不  
責子路之非也疾病行禱者臣子之於君父各禱於  
其所當祭子路所欲禱必非淫祀但不當請耳○病  
而與聞乎禱則是不安其死而諂於鬼神以苟須臾  
之生君子豈為是哉祈禱卜筮之屬皆聖人之所作  
至於夫子而後教人一決諸理而不屑於冥漠不可  
知之間其所以建立人極之功於是而備○問嘗疑  
集註曰聖人未嘗有過無善可遷其素行固已合於  
神明故曰丘之禱久矣夫自其論聖人所以無事於  
禱者其義固如此然此一句乃聖人自語也聖人之

意豈自謂我未嘗有過無善可遷其素行固已合於神明哉曰聖人固有不居其聖時節又有直截擔當無所推讓時節如天生德於予未喪斯文之類蓋誠有不可揜者○南軒張氏曰子路請禱而夫子告之以有諸蓋欲子路深省夫禱之理也苟知其有是理則知夫子之何用禱也而子路未達獨舉誅以為證於是從而告之曰丘之禱久矣蓋禱者悔過遷善之意平日之思慮云為神之聽之未嘗斯須離也一有未順則逆於神理是則當禱也若夫聖人之心則所謂天且弗違而况於鬼神乎獨曰丘之禱久矣辭氣謙厚而所以啟告子路者亦至矣○慶源輔氏曰疾病而行禱乃臣子迫切之至情在周公猶為之然周公則可武王則不可子路則可夫子則不可領子路之至情明在己之正理夫子之心即天地神祇之心也○厚齋馮氏曰觀夫子答婿竈之問以為獲罪於天無所禱也然則行與天合禱何所用在于子路為夫

子禱則可請於夫子而後禱則夫子不為也○雲峯胡氏曰禱自是臣子之至情無所事禱自是聖人之素行不必以夫子之言遂謂禱為無亦不必以子路之言直謂禱為有要之鬼神之有無不必問但人之素行自不可失爾

○子曰奢則不孫儉則固與其不孫也寧固

孫去聲

孫順也固陋也奢儉俱失中而奢之害大

雲峯胡氏曰與其奢

也寧儉是言禮之弊也如此與其不孫也寧固是言弊之極也其終必至於此○新安陳氏曰奢失之過儉失之不及皆非中道然奢而僭犯為害甚○晁氏

曰不得已而救時之弊也

問奢則不孫朱子曰纔奢便是

不戰歛



也且看奢底人意思儉底人意思那奢底人便有驕  
傲底意思須必至於過度僭上而後已○問奢非止  
謂僭禮犯上之事只是有夸  
張侈大之意便是否曰是

○子曰君子坦蕩蕩小人長戚戚

坦平也蕩蕩寬廣貌程子曰君子循理故常舒泰小  
人役於物故多憂戚○程子曰君子坦蕩蕩心廣體

胖

南軒張氏曰正已而不求諸人故坦蕩蕩狗欲而不自反故長戚戚坦蕩蕩非謂故懷自適無所憂

慮之謂也謂求之在已而無必於外故常舒泰云耳  
○胡氏曰循理役於物乃蕩蕩戚戚之所由生也理  
本自然循而行之則坦然而平不愧不作所以舒泰  
為物所役則求名役於名求利役於利行險僥倖患

得患失所以憂戚○厚齋馮氏曰蕩蕩曰坦其心無適而不寬廣也戚戚曰長無時而不憂慮也

○子温而厲威而不猛恭而安

厲嚴肅也人之德性本無不備而氣質所賦鮮上有聲

不偏

慶源輔氏曰德性根於無極之真所以本無不備氣質稟於陰陽五行之氣有剛柔過不及之

分所以鮮

惟聖人全體渾上然陰陽合德

雙峯統氏曰全體渾

然應上文德性而言陰陽合德應上文氣質而言

故其中和之氣見賢遍於

容貌之間者如此

朱子曰厲便自有威底意思不猛便自有温底意思温威恭三字是

主厲不猛安是帶說如伯夷柳下惠猶未免偏下惠則温勝厲伯夷則厲勝温○問集註云陰陽合德竊

嘗因其言而分之以上三截為陽而下三截為陰似  
乎有合然又以上三截為陰而下三截為陽亦似有  
合未知所決抑聖人渾是一元氣之會無間可得而  
指學者強為之形容如且以其說自分三才而言則  
溫然有和之可挹而不可屈奪則人之道也儼然有  
威之可畏而不暴於物則天之道也恭順卑下而恬  
然無所不安則地之道也自陽根陰而言則溫者陽  
之和厲者陰之嚴威者陽之震不猛者陰之順恭者  
陽之主安者陰之定自陰根陽而言則溫者陰之柔  
厲者陽之剛威者陰之慘不猛者陽之舒恭者陰之  
肅安者陽之健蓋渾然無適而非中正和平之極不  
可得而偏指者也曰此說推得亦好○溫厲之說若  
直以厲為主誠可為一偏之論矣或恐以氣質之偏  
而欲矯以趨中則有當如是者亦不為過矣然聖人  
之溫而厲乃是天理之極致不勉不思自然恰好毫  
髮無差處要須見此消息則用力矯揉隨其所當自

有準則不至偏倚矣○此雖是說聖人之德容如此然學者也當如此舉偏補弊蓋自舜之命夔已如此而臯陶陳九德亦然○初學如何便得安除是孔子方恭而安初要持敬也須勉強久後自熟○南軒張氏曰和順充積者其發見必溫然溫而厲也德盛者其威必著於外威而不猛也從容中禮者其貌必恭恭而安也溫而不厲則和而無制有害於溫矣威而猛則為物所憚有病於威矣恭而不安則不可以持久有損於恭矣從容而全盡者其唯聖人乎○新安陳氏曰常人偏於溫則不厲偏於威則易猛勉於恭則不安聖人溫而厲陽中有陰也威而不猛陰中有陽也恭而安恭者嚴威儼肅陰也安者和順自然陽也亦陰中有陽也惟其不偏而中是以不戾而和惟聖人有中和自然之德性所以有中和自然之德容

也  
時人熟察而詳記之亦可見其用心之密矣抑非

知去聲足以知聖人而善言德行去聲者不能記慶源輔氏曰用

心不密則見其溫不見其厲餘皆然故程子以為曾子之言學者所宜


反復

方服反

而玩心也

問此章是總言聖人容貌鄉黨是逐事上說否朱子曰然此章

就大體上看



論語集註大全卷七